

Ո Ր Ո Շ ՈՒ Մ թիվ-130
վարչական տույժ նշանակելու մասին

«22» ապրիլի 2022թ.

ք. Երևան

ՀՀ պետական եկամուտների կոմիտեի իրավաբանական վարչության պետ Արման Մնացականյանս, քննելով Աղասի Արայի Ասատրյանի վերաբերյալ նյութերը.

Պ Ա Ր Զ Ե Ց Ի

ՀՀ ՊԵԿ հետբացթողումային հսկողության վարչության աշխատակիցները իրականացրել են կամերալ մաքսային ստուգում «ԷՍԶԻԱՅ-ԻՆՎԵՍՏ» ՍՊ ընկերությունում, որի արդյունքում պարզվել է, որ ընկերության անվամբ թիվ 05100010/201020/0067451 ապրանքների հայտարարագրով «ԼՈԳԱՍՏԵՆՅԱԿԻ ՏՐԻԿՈՏԱԺԵ ԽԱԼԱԹՆԵՐ՝ ԲԱՄԲԱԿԵ ՄԱՆՎԱԾՔԻՑ, ՏՂԱՄԱՐԴԿԱՆ ՀԱՄԱՐ» նկարագրությամբ ապրանքատեսակը հայտարարագրվել է ԵԱՏՄ ԱՏԳ ԱԱ 6107 91 000 00 ծածկագրով ապրանքի բնահրային արտահայտությամբ ֆիզիկական բնութագրի վերաբերյալ սխալ տեղեկություններ նշելով:

Նշված ԵԱՏՄ ԱՏԳ ԱԱ ծածկագրով հայտարարագրված ապրանքների համար Որոշմամբ սահմանված է մաքսատուրքի դրույքաչափ՝ 1,75 Եվրո 1կգ-ի համար, իսկ նշված ԱՀ-ի 2-րդ ապրանքային դիրքում հայտարարագրված 587,5կգ նետտո քաշով ապրանքի համար հաշվարկվել է 1,013 ՀՀ դրամ մաքսատուրք, այսինքն՝ մաքսատուրքը 587,5կգ-ի փոխարեն հաշվարկվել է 1կգ-ի համար կիրառելով 1,75 Եվրո (օրվա փոխարժեքը՝ 578.9100 ՀՀ դրամ - 1 Եվրո) դրույքաչափը: Այնինչ, տվյալ դեպքերում մաքսատուրքը պետք է հաշվարկվեր և վճարվեր ապրանքի 587,5կգ նետտո քաշի համար՝ յուրաքանչյուր կիլոգրամի համար կիրառելով 1,75 Եվրո (օրվա փոխարժեքը՝ 578.9100 ՀՀ դրամ - 1 Եվրո) դրույքաչափը:

Իրականացված կամերալ մաքսային ստուգման արդյունքում 16.03.2022 թ. կազմվել է թիվ 0026-Ա ստուգման ակտը և «ԷՍԶԻԱՅ-ԻՆՎԵՍՏ» ՍՊ ընկերությանն առաջարկվել է ճշգրտել թիվ 05100010/201020/0067451 ապրանքային հայտարարագրի համապատասխան ապրանքային դիրքում հայտարարագրման ենթակա մաքսատուրքի հաշվարկման համար բնահրային արտահայտությամբ ֆիզիկական բնութագիրը՝ ապրանքի նետտո քաշը՝ վճարելով պակաս վճարված մաքսային վճարները և տույժերը: Կամերալ մաքսային ստուգման նյութերն ուղարկվել են ՀՀ ՊԵԿ իրավաբանական վարչություն մաքսային կանոնների խախտման հատկանիշների հարցը պարզելու համար:

Նյութերի ուսումնասիրման արդյունքում պարզվել է, որ թիվ 05100010/201020/0067451 ապրանքների հայտարարագիրը ներկայացրել է մաքսային ձևակերպումների մասնագետ Աղասի Արայի Ասատրյանը:

2022 թվականի մարտի 31-ին ապրանքի ծածկագրի վերաբերյալ ոչ ճշգրիտ տեղեկություններ ներկայացնելու փաստի կապակցությամբ ՀՀ ՊԵԿ իրավաբանական վարչությունում Աղասի Արայի Ասատրյանի նկատմամբ ՀՀ մաքսային օրենսգրքի 203-րդ հոդվածի 1-ին մասի 2-րդ պարբերության հատկանիշներով կազմվել է մաքսային կանոնների խախտման վերաբերյալ արձանագրություն, որի մեկ օրինակն ուղարկվել է նրան:

Աղասի Արայի Ասատրյանը ծանուցվել է վարչական վարույթի մասնակցության մասին, վերջինս չի ներկայացել և որևէ առարկություն չի հայտնել:

ԵԱՏՄ մաքսային օրենսգրքի (այսուհետ՝ Օրենսգիրք) 2-րդ հոդվածի 32-րդ կետի համաձայն՝ «մաքսային հայտարարագիրը» մաքսային փաստաթուղթ է, որը պարունակում է տեղեկություններ ապրանքների վերաբերյալ կամ ապրանքների բացթողման համար անհրաժեշտ այլ տեղեկություններ, իսկ 35-րդ կետի համաձայն՝ մաքսային հայտարարագրումը մաքսային մարմնում մաքսային հայտարարագրի միջոցով ապրանքների վերաբերյալ տեղեկությունների, ընտրված մաքսային ընթացակարգի վերաբերյալ և (կամ) ապրանքների բացթողման համար անհրաժեշտ այլ տեղեկությունների հայտագրումն է: Սույն հոդվածի 7-րդ կետի համաձայն՝ հայտարարատուն այն անձն է, որը հայտարարագրում է ապրանքներ կամ որի անունից հայտարարագրվում են ապրանքներ:

Օրենսգրքի 104-րդ հոդվածի համաձայն՝ ապրանքները ենթակա են մաքսային հայտարարագրման դրանք մաքսային ընթացակարգով ձևակերպելու կամ սույն Օրենսգրքին համապատասխան սահմանված այլ դեպքերում: Մաքսային հայտարարագրումն իրականացվում է հայտարարատուի կամ մաքսային ներկայացուցչի կողմից, եթե սույն օրենսգրքով այլ բան սահմանված չէ: ԵԱՏՄ մաքսային օրենսգրքի 105-րդ հոդվածի համաձայն՝ մաքսային ընթացակարգերով ձևակերպելիս, բացառությամբ «մաքսային տարանցում» մաքսային ընթացակարգի, մաքսային մարմին է ներկայացվում ապրանքների մասին հայտարարագիր: ԵԱՏՄ մաքսային օրենսգրքի 106-րդ հոդվածով սահմանվում են ապրանքների հայտարարագրերում նշման ենթակա տեղեկությունները: 106-րդ հոդվածի 1-ին մասի 4-րդ կետի համաձայն՝ հայտարարագրում նշվում են տեղեկություններ ապրանքների մասին, որոնց մեջ ի թիվս այլոց նշվում է քանակը՝ արտահայտված կիլոգրամներով (գտաքաշը) և չափման լրացուցիչ միավորներով:

Օրենսգրքի 84-րդ հոդվածի 3-րդ կետի համաձայն՝ հայտարարատուն անդամ պետությունների օրենսդրությանը համապատասխան, պատասխանատվություն է կրում սույն հոդվածի 2-րդ կետով նախատեսված պարտականությունները չկատարելու, մաքսային հայտարարագրում ոչ հավաստի տեղեկություններ հայտագրելու համար:

Օրենսգրքի 404-րդ հոդվածի 1-ին մասի համաձայն՝ մաքսային գործառնություններ իրականացնելիս մաքսային ներկայացուցիչն ունի նույն իրավունքները, որոնք ունի այն անձը, որը լիազորում է նրան ներկայացնելու իր շահերը մաքսային մարմինների հետ փոխհարաբերություններում: 2-րդ մասի համաձայն՝ իր գործունեությունն իրականացնելիս մաքսային ներկայացուցիչն իրավունք ունի իր կողմից ներկայացվող անձից պահանջելու մաքսային գործառնությունների իրականացման համար անհրաժեշտ, այդ թվում՝ առևտրային, բանկային և օրենքով պահպանվող այլ գաղտնիք կազմող տեղեկատվություն կամ այլ գաղտնի տեղեկատվություն պարունակող փաստաթղթեր և տեղեկություններ, և այդ փաստաթղթերն ու տեղեկություններն ստանալու այնպիսի ժամկետներում, որոնցով ապահովվում է սույն Օրենսգրքով սահմանված պահանջների կատարումը: 405-րդ հոդվածի 1-ին մասի 6-րդ կետի համաձայն՝ մաքսային ներկայացուցիչը պարտավոր է կատարել սույն Օրենսգրքով սահմանված և (կամ) անդամ պետությունների՝ մաքսային կարգավորման վերաբերյալ օրենսդրությամբ սահմանվող այլ պարտականություններ: «Մաքսային կարգավորման մասին» ՀՀ օրենքի 27-րդ հոդվածի 2-րդ մասի համաձայն՝ մաքսային ներկայացուցչի և հայտարարատուի կամ նրա լիազորած անձի միջև հարաբերությունները կարգավորվում են նրանց միջև կնքված պայմանագրերով:

ՀՀ մաքսային օրենսգրքի 189-րդ հոդվածի 1-ին և 2-րդ մասերի համաձայն՝ մաքսային կանոնների խախտում է համարվում անձի կողմից կատարված անօրինական գործողությունը կամ անգործությունը, որն ուղղված է Հայաստանի Հանրապետության մաքսային օրենսդրությամբ և մաքսային ոլորտին առնչվող Հայաստանի Հանրապետության միջազգային պայմանագրերով

Հայաստանի Հանրապետության մաքսային սահմանով տեղափոխվող ապրանքների և տրանսպորտային միջոցների մաքսային հսկողության և մաքսային ձևակերպման սահմանված կարգի դեմ, և որի համար սույն օրենսգրքով նախատեսված է պատասխանատվություն: Ֆիզիկական և պաշտոնատար անձինք մաքսային կանոնները դիտավորյալ կամ անզգուշորեն խախտելու համար ենթակա են պատասխանատվության:

ՀՀ մաքսային օրենսգրքի 203-րդ հոդվածի 1-ին մասի 2-րդ պարբերության համաձայն՝ Հայաստանի Հանրապետության մաքսային սահմանով տեղափոխվող ապրանքները և տրանսպորտային միջոցները չհայտարարագրելը կամ ոչ իրենց անվանմամբ հայտարարագրելը կամ հայտարարագրման ժամանակ ոչ ճշգրիտ տեղեկություններ նշելը, որի արդյունքում առաջանում է մաքսային վճարների պակաս հաշվարկում կամ չհաշվարկում, առաջացնում է տուգանք՝ այդ մաքսային վճարների 50 տոկոսի չափով:

Մաքսային կանոնների խախտումների վերաբերյալ վարույթի շրջանակում հաստատվել է այն հանգամանքը, որ Աղասի Արայի Ասատրյանի կողմից ապրանքները հայտարարագրվել են ապրանքի մաքսատուրքի հաշվարկման համար նետոտ քաշի վերաբերյալ ոչ ճշգրիտ տեղեկություններով:

Ա. Ասատրյանը 2022 թվականի ապրիլի 22-ին հրավիրվել է ՀՀ ՊԵԿ իրավաբանական վարչություն՝ իր նկատմամբ ՀՀ մաքսային օրենսգրքի 203-րդ հոդվածի հատկանիշներով սկսված վարչական գործի քննությանը մասնակցելու համար և միաժամանակ նախազգուշացվել, որ համաձայն ՀՀ մաքսային օրենսգրքի 219-րդ հոդվածի՝ չներկայանալու դեպքում վարչական գործի քննությունը կիրականացվի իր բացակայությամբ:

Այսպիսով, գործի նյութերով պարզվել է, որ թիվ 05100010/201020/0067451 ապրանքների հայտարարագրով ՀՀ տարածք ներմուծված և համապատասխան ապրանքային դիրքում հայտարարագրման ենթակա մաքսատուրքի հաշվարկման համար լրացվող նետոտ քաշի վերաբերյալ սյունակը հայտարարագրվել է ոչ ճշգրիտ տեղեկություններով, ինչի հետևանքով առաջացել են 713010 ՀՀ դրամի չափով պակաս հաշվարկված մաքսային վճարներ, այսինքն՝ Ա. Ասատրյանը թույլ է տվել ՀՀ մաքսային օրենսգրքի 203-րդ հոդվածի 1-ին մասի 2-րդ պարբերությամբ նախատեսված մաքսային կանոնների խախտում, ինչը հիմնավորվում է ՀՀ ՊԵԿ հետքացթողումային հսկողության վարչության 16.03.2022 թվականի թիվ 0026-Ո-1 որոշմամբ, ՀՀ ՊԵԿ հետքացթողումային հսկողության վարչության 16.03.2022 թվականի թիվ 0026-Ա ստուգման ակտով, թիվ 05100010/201020/0067451 ապրանքների հայտարարագրով:

Վերոգրյալի հիման վրա և ղեկավարվելով ՀՀ մաքսային օրենսգրքի 203-րդ հոդվածի 1-ին մասի 2-րդ պարբերությամբ, 206-րդ և 221-րդ հոդվածներով,

Ո Ր Ո Շ Ե Ց Ի՝

1. Աղասի Արայի Ասատրյանին ճանաչել զանցառու ՀՀ մաքսային օրենսգրքի 203-րդ հոդվածի 1-ին մասի 2-րդ պարբերությամբ և նրան տուգանել 356505 ՀՀ դրամ: /900005024055 (կող-19) հաշվեհամարին/

2. Որոշման մասին հայտնել Ա. Ասատրյանին՝ պարզաբանելով, որ ՀՀ մաքսային օրենսգրքի 221-րդ հոդվածի 2-րդ մասի համաձայն՝ որոշումն ուժի մեջ է մտնում կայացման պահից: ՀՀ մաքսային օրենսգրքի 222-րդ հոդվածի համաձայն՝ որոշումը կարող է բողոքարկվել վերադաս մաքսային մարմին՝ այն կայացնելուց հետո 10 օրվա ընթացքում կամ Վարչական դատարան երկու ամսվա ընթացքում:

ԻՐԱՎԱԲԱՆԱԿԱՆ
ՎԱՐՉՈՒԹՅԱՆ ՊԵՏ

Ա. ՄՆԱՅԱԿԱՆՅԱՆ